

16 SEP 2003

Mahathir-Kakitangan

DR MAHATHIR UCAP TERIMA KASIH KEPADA KAKITANGAN AWAM

PUTRAJAYA, 16 Sept (Bernama) -- Perdana Menteri, Datuk Seri Dr Mahathir Mohamad mengucapkan terima kasih kepada semua kakitangan awam di atas kerjasama erat yang ditunjukkan mereka dalam menjalankan dasar-dasar kerajaan selama beliau memegang jawatan sebagai Perdana Menteri.

"Saya benar-benar ingin mengucapkan terima kasih. Sepanjang karier saya, saya telah mendapat kerjasama penuh dari kakitangan awam serta lain-lain kakitangan kerajaan," katanya.

Katanya beliau amat menghargai khidmat kakitangan awam yang dianggapnya begitu profesional dalam membawa negara ketaraf menjadi sebuah negara yang berjaya.

"Semua kakitangan awam membantu dan melaksanakan dasar-dasar kerajaan sebagaimana yang dikehendaki," katanya semasa berucap pada majlis makan malam Bajet 2004 bagi meraikan petugas Perbendaharaan yang terlibat dalam penyediaan Bajet 2004 yang dibentangkannya Jumaat lepas.

Majlis itu turut dihadiri oleh Menteri Kewangan Kedua, Datuk Dr Jamaludin Jarjis, Menteri Pengangkutan Datuk Chan Kong Choy, Ketua Setiausaha Negara, Tan Sri Samsuddin Osman dan Ketua Setiausaha Kementerian Kewangan, Tan Sri Dr Samsudin Hitam.

Beliau juga mengucapkan terima kasih kepada peserta-peserta dialog pra belanjawan termasuk ahli-ahli perniagaan dan badan-badan bukan kerajaan yg memberi cadangan serta input dalam Bajet 2004.

"Saya tidak fikir ia (Bajet 2004) boleh siap keesokan harinya tapi dengan kerjasama warga Perbendaharaan ia berjaya disiapkan. Saya kagum dengan kerjasama yang ditunjukkan oleh warga Perbendaharaan," katanya.

Dr Mahathir juga berkata penyediaan Bajet 2004 adalah mengikut kemampuan kerajaan untuk keperluan rakyat dan negara.

"Nak bagi semua yang diminta kadang-kadang tidak mampu ... kita kena ikut keperluan, kemampuan kita."

Beliau berkata negara berbelanja mengikut kemampuan dan tidak mahu banyak berhutang. Katanya jika negara terlalu banyak hutang, negara akan muflis.

Oleh itu, Dr Mahathir berkata beliau akan berusaha sedaya upaya untuk membelanjakan wang kerajaan dengan penuh berhemah dan ini ditunjukkan dalam pembentangan bajet baru-baru ini yang merangkumi semua sektor.

-- BERNAMA

RIZ JM AZH